



KOMUNIKADO PA PRENSA

Fecha

18/03/2021

Sentro Multifunshonal Juan Domingo a bira realidat

Willemstad – Riba djamars 15 di mart 2021 a hasi entrega oficial di e Sentro Multifunshonal Juan Domingo. Bario di Juan Domingo awor ta konta ku un bunita área deportivo. Gobièrnu di Kòrsou huntu ku Kooyman i Unidat di Bario a traha huntu pa desaroyá esaki.

E evento di entrega a tuma lugá den un seno chikitu huntu ku representantenan di bario, mirando e desaroyonan den e bario di Juan Domingo. Tambe a tene un momentu di silencio na honor di Almier Godett, ku tabata un persona bastante aktivo positivamente den e bario.

Último añanan e área di Jan Noorduynweg a mira diferente desaroyo positivo, manera entre otro konstrukshon di Kooyman Megastore, un rotònde na altura di Cost-U-Less, i a duna La Curaçao un tereno komo opshon pa nan edifisio nobo. Awor e sentro tambe a bira un realidat kaminda ta enfoká riba e aspekto sosial i deportivo di bario.

Juan Domingo ta konosí pa su baluartenan den deporte, i tur aktor a mira e importansia pa duna rekonosementu i sigui stimulá esaki tambe. Pa e motibu aki, e área deportivo ta konsistí di un vèlt di futbòl, i un kancha multi-funshonal pa entre otro basketbòl i vòlibòl. E trabounan a kuminsá na yùli 2020 i a terminá awor na mart 2021. E trabounan tabata na enkargo di kontratista CWM.

Den futuro lo konstruí e sentro di bario kaminda bario por bini huntu pa diferente aktividat.

Durante di e seremonia Minister di Tráfiko, Transporte i Planifikashon Urbano sra. Zita Jesus-Leito a trese dilanti ku e ta atmirá e espíritu di e bario ku no opstante ku e preparashon di e proyekto a stanka un tiki, nan a sigui ku mes un konvikshon pa e realisashon final di e proyekto.